

01 AI 阿姨有夠勢

林虹好

聽講這幾年有一个足勢的阿姨，真正是衝甲掠袂牢，佇咱的生活中嘛定定看會著伊，而且伊跤手猛醒、耐操好用，做代誌閣無啥會重耽，會使講家家戶戶攏捌伊，猶毋過你可能毋知影伊的名。這個轟動武林、驚動萬教的阿姨到底是啥人咧？

原來逐家攏叫伊『AI』，嘛有人叫伊「人工智慧」，主要就是予機器像人類全款，會有自我思考佻學習的能力。其實伊無性別，按呢是按怎我欲叫伊阿姨咧？因為頭先看著這兩字，感覺佻咱臺羅拼音的「阿姨」閣真相閣，規氣就共叫做「AI 阿姨」，嘛呼應人工智慧親像人全款的感覺，想想咧閣不止仔心適。

人工智慧的意思聽著敢若真複雜，其實咱攏無發現，這個 AI 阿姨早就用無全款的形式佇咱的身軀邊出現矣，親像掃塗跤機器人，抑是隨咻隨應的手機仔語音助理，遮的攏是應用這個技術。以前有一支電視廣告講：「電腦嘛會揀塗豆喔！」就是咧講伊厲害的分辨能力，毋管是傷細粒子、歹看面的，若是拄著伊，全部攏會當共伊 giat-láu 揀畚斗，真正做甲比人類閣較頂真閣幼路！

最近閣較勢的是，這個 AI 阿姨連講臺灣台語嘛會通呢！

若是拄著外國人講英語，透過伊的翻譯，嘛會當共英語翻做臺灣台語，逐家就算語言袂通，若有伊的幫贊就任考不倒！

猶毋過 AI 其實已經存在幾若十冬矣，是按怎這幾冬逐家才愈來愈注重伊咧？這是因為伊的技術那來那進步，能力嘛愈來愈強。上好的例就是 2023 年，佇瑞士舉辦全球第一場的 AI 機器人記者會，有記者問機器人：「你敢有可能會造反？」彼个機器人竟然參人全款有表情佻情緒，馬上就對記者反白睚。雖然干焦是簡單一个眼神，毋過這嘛代表咱袂當無注重這個問題，若無是會林投葉拭尻川——去倒裂。

未來若是人工智慧愈來愈發展，雖罔咱的生活會加真利便，不而過這嘛代表伊會愈來愈巧，甚至有可能最後想欲取代人類。往過的電影嘛捌搬過這款劇情，這嘛是值得咱全人類去思考的問題。

02 予恁快樂，我就快樂矣

洪健勛

佇國校仔的時，我捌參加學校的布袋戲社團。布袋戲界有一个原則，嘛會使講流傳一句話，叫做「賣藝賣聲不賣面」，意思就是搬演布袋戲的人愛覷佇戲台仔的後壁，袂使予觀眾看著個的面，避免台跤的觀眾無認真咧看戲，攏咧注意演師的面容生做啥物款。我感覺窮真嘛是為著欲保護搬布袋戲的跤步手路，才袂予人共伊的工夫學去。

我加入社團差不多有兩冬矣，阮搬的戲有足濟種風格，有較悲傷的、較談諧的，猶有武俠戲，精彩的戲肉予觀眾看甲目睷毋甘瞞。啊若我上愛搬的，就是會當予觀眾笑甲反過的笑談齣，聽著台跤的觀眾笑哈哈，我的心內嘛會感覺真爽快。檢采我有這款予別人快樂，家己嘛會快樂的個性，所以也真慣勢佇人看袂著真面目的所在，弄甲予人真歡喜。

國中的時陣，學校嘛有誠相嚮的社團，就是「電音三太子」。駛入去三太子的尪仔了後，干焦會使靠尪仔的喙空看著外口，一巡喙空狹狹閣扁扁，成做我佻民眾唯一的連結。毋過個從到今毋捌共我注意過，干焦會去感受著三太子的活力，猶閣有囡仔人的健丟。

阮學校的三太子團體較捷去一寡暗會、某乜所在欲開

幕，或者是運動會、頒獎典禮等等，較罕得去廟會抑是彼種迎鬧熱的所在。佻遮的民眾咧互動的時陣，定定會看著個彼種單純的笑容，無需要講話，干焦透過阮的動作佻個ǎi-sat-tauh，就通共快樂湊予個，這嘛是我快樂的來源。

敢是我生本就誠愛看著別人笑微微的面容，所以佇我參加遮的社團的時陣，一直攏是用「予別人歡喜」成做我的指標。雖罔遮的笑容攏是三太子的功勞，毋過若無我，尪仔干焦會當恬恬站佇遐，所以我濟少食著紅嘛是合情合理的啦！

原來予人歡喜，家己嘛會感受著這份情緒，就親像媽祖繞境的時，路邊分送食物的人，明明都無相捌，是按怎欲對我遮好，閣驚我會楞著。除了媽祖的力量以外，我相信是逐家善良的心予人引恁出來，予咱通繼續共快樂佻善良湊出去。

03 岡山市仔的芳味

黃金鷹

會記得細漢上期待的是歇暍日陪阿母去菜市仔買菜，因為阿母逐擺擺會順繼恁我去食市仔內各種無仝的點心。

菜市仔內的點心百百款，若講著岡山市仔，就袂當無講著頂港有名聲、下港上出名的「岡山羊肉」，我上愛食的就是當歸羊肉米粉。雖然細細碗，毋過氣味十足，中藥味的湯頭是芳貢貢，閣有摻一寡仔薑絲壓味。羊肉愛搵岡山的特產「甘味豆瓣醬」，食一喙就感受著幸福的滋味、啉一喙規個人就攞燒烙起來，食過的人攞嘛呵咾甲會觸舌。

熱天的時陣，上愛去食「金名記」的古早味豆花，冰冰、涼涼閣甜甜，佇燒熱的天氣，食落去就心涼脾土開！個的豆花簡單簡單，干焦摻一屑仔用烏糖炒過的糖膏爾爾，毋免濫紅豆、粉圓抑是塗豆仁，欲食著愛排隊等到有位通坐，因為個上啞人的所在，是綿綿綿閣有芳貢貢的豆仔味，予人食了會繼喙。若食煞，我猶會央阿母閣買一碗才來去轉，當做下晡時的點心。

厝裡若有人客來，抑是阿兄、阿姊欲食加菜的便當，阮會去舊市仔口的頭一擔——「堂伯仔」遐交關。個是咧賣粉腸、豬肝繭、肉羹恰糊料的。若講著個兜的粉腸、豬肝繭，毋但真材實料，氣味閣誠特別。每一塊切開的粉腸

內底攞看會著規角規角的精肉，軟軟、飴飴；豬肝繭內底毋但有豬肝，閣有切甲幼幼的豆仔薯恰蔥仔，是別位食無的，食過的人攞恰意甲比大頭拇喝讚！

對市場欲轉去厝的路裡，閣有一擔一定愛食的，彼就是「新源發」的烘麩。恁毋通看烘麩無點，雖罔伊看著仝款是兩塊俗麩飲醬料，毋過規臺灣行透透干焦遮才食會著神奇的口味。個醬料的口味毋是早頓店通常會出現的塗豆、草莓，是老頭家娘家已研發的「木瓜醬」，袂傷甜閣有保留木瓜的清芳。薄薄一沿木瓜醬恰一粒卵包，俗麩的外口片閣抹一沿 bá-tah，用烘爐烘甲淡薄仔臭焦臭焦，真正芳甲予人擋袂牢，想欲趕緊共咬一喙。

這寡岡山市仔的芳味是陪伴我成長的氣味，就算講我已經經歷過真濟酸甘苦澀，毋過個的芳味猶原佇遐共我支持，永遠袂變。

04 跔山去讀冊

王駿揚

逐工透早看著欲去學校讀冊的國中生，有的坐佇序大人的 oo-tóo-bái 頂涼勢仔涼勢；有的騎鐵馬，沿路袂輸較車全款騎咧飛；有的怙行的，煞行甲汗流汁滴。遮的畫面攏會予我回想著家己國中三年的讀冊路。

阮父母是做工仔人，樸實閣認份，個認為屬佇佗一个學區就該當去彼个學區的學校報到。彰化國中佇八卦山頂，我國校仔出業了後，就按呢開始跔山去讀國中。

透早若趕時間，我攏是對中山國校邊仔彼條小路仔跔起去，經過國聲電台，直迳山頂的大通路。蹓過大佛，盤過綜合運動埕，閣跔二、三十坎的石坎就到學校矣。囡仔人跤手較猛掠，頭犁犁直直控起去，上緊的記錄是較臨十五分鐘就對山跔到校門口矣。

山裡的路百百條，這條迳彼條，會使滿山走透透。四界樂跔、探險就成做阮散學的時，參同窗鬥陣的心適代。

大通路是闊闊的打馬膠路，看著黃昏的紅霞，阮起毛一下娒就那行那唱歌。猶毋過綴落崎的跔步頓一下、頓一下，本成就無蓋好聽的鴨雄仔聲，煞成做噪人耳的牛聲馬喉，不而過就準講予過路人降，阮一陣人嘛攏無顫悶著。

啊若熱人，著愛行樹林仔內的小路才會較秋清。規山

坪的相思仔，毋驚無樹蔭通遮日，上驚的是樹仔頂的蜷蚰蟻漩尿。彼个年代的查埔囡仔攏是剃芋仔頭，頭殼若噴著蟬仔尿隨嘛知，著獎的人喙那詈、手那拌，閣較衰稜的是這層代誌會去予同學消遣咧幾若工！

有一个同窗的個兜路途較寫遠，招我佻伊做伙騎鐵馬去讀冊。袂堪得人好喙姑情，彼站仔我就舊鐵馬踏咧，展現我死忠兼換帖的義氣，佻伊鬥陣行。是按怎講甲遮嚴重？煞毋知鐵馬干焦會當騎到山腹，共鐵馬寄跔停車場了後，繼落去毋但著愛步輦，山坪闊夭壽崎，而且專是石頭仔，無細膩就會趨倒。逐工按呢操，無甲一學期，布鞋就開框矣，落尾也是怙行的較省本閣省事。

我有時嘛會欣羨別人是爸母咧接送，抑是 tha-khú-sih¹ 坐到位。不而過想倒轉來，跔山會當維持健康，規山頭五路走嘛蓋趣味。

¹閣唸做 thā-khú-si/thā-khú-sih

05 數念的滋味

吳心燕

有一項好食物予我思思念念，按怎揣都揣袂著全款的滋味，彼就是阮阿伯手工做的筍仔包，到今猶揣無佢伊會當比並的。

國中的時，課業愈來愈重，我驚綴人袂著，讀冊讀到三更半暝是誠四常的代誌。外口暗摸摸，佳哉有蹉阮對面的阿伯和我做伴。伊佇遐做包仔、饅頭，對窗仔迴過來的電火光予我加真安心。逐暗阿伯會先炊饅頭，繼落來一床一床的包仔就接續出爐囉。一陣一陣的芳氣衝對我遮來，予人接載袂牢，我的腹肚嘛枵甲 kū-kū 叫，就走過去揣阿伯「阿伯你會忝袂？有需要鬥相共無？」阿伯早就看出出，知影我是予芳味嚟來的，隨共一粒白 phau-phau、幼麵麵的包仔抹予我，共我講：「燒喔！欲食佻濟做你提，食飽通好去睏，囡仔人愛睏有飽眠才會勢大漢。」

阿伯做的包仔有豆沙包、高麗菜包，啊若筍仔包就愛等到竹筍大出的時才食會著。新曆四、五月仔開始，便若過晝，種竹筍的阿叔會載兩布袋的筍仔，園佇阿伯個兜的門跤口。看著筍仔我就暗暗仔歡喜，又閣有我上愛的筍仔包通食囉！

下晡時仔阿伯咧補眠、阿姆佇灶跤咧無閒，若較早放學，我就會入去灶跤鬥相共。阿姆的跤手真猛掠，兩布袋的筍仔，伊一下手就共殼剝甲好勢溜溜。菜刀擰咧，無一觸久仔一支一支的筍仔就變做規桶的筍絲，那佢我講話雙手嘛無停睏。灶頭大鼎的煙一直衝，我干焦會曉做添柴的雜差仔工爾爾。做食的有影無輕可，一大桶的筍仔倒落去大鼎，就算我氣力催甲盡磅嘛拈伊無法。翕熱的燒氣予人規身軀流汗滲滴，原來我愛食的筍仔包是遮爾仔厚工。

這馬阿伯、阿姆攏無佇咧矣，我揣無記持內底彼種氣味的筍仔包。便若看著有人咧賣包仔，我攏會行倚去共問講：「有賣筍仔包無？」毋過食過遐濟擔，猶是揣無我思思念念的好滋味，予我有淡薄仔失望。

一粒普通的筍仔包，有我對親人深深的懷念，是任何山珍海味攏無法度代替的。你若有食過，無定著會佢我全款愛著這味喔！

06 是真的？抑是假的？

陳惠珠

咧欲過年矣，愈倚年節，菜市仔買物件的人就愈濟，真正是鬧猜猜。囡仔人愛綴路，阮綴阿母去菜市仔鬥鬧熱，順繼共阿母鬥揸菜。菜市仔人映人，滿四界攞是喝賣的聲，鬧熱滾滾。我緊共阿母拊牢牢，若無，拍毋見就慄揣矣。

菜擔、果子擔、雜貨仔擔……逐項都有，免驚買無。阮攞來到果子擔，阿母講欲買幾粒仔棗仔通好佇過年的時拜拜。頭家講伊的棗仔大粒閣甜物物，著愛配白滾水食。看伊講甲喙角專泡，袂輸摻糖仝款遐爾仔甜，正經是家己褒較袂臭臊。逐家相挨相映下性命買，敢若驚會買無咧，落尾閣愛相爭結數。頭家無閒頤頤，那收錢那笑甲喙仔裂獅獅。阿母提一千箍予頭家找，提著找的錢，阮就緊映出去覘別擔、買別物。

買甲險險仔揸袂去，雖罔是寒天，毋過阮規身軀大粒汗、細粒汗，想欲較緊轉去厝裡小歇睏一下。無疑悟阿母雄雄喝一聲：「哪會按呢？」我緊走去看是發生啥物代誌。阿母手提一張五百箍的講：「這敢若是假的呢！」我緊共提過來斟酌看，毋知佗位怪怪，若像毋是真的。

阮隨上網去中央銀行的網站，查看按怎認紙票的真假。輕輕仔轉紙票的角度，倒引下仔的數字五百，本底是金色

會變做青色。沓沓仔轉覘，變色的安全線會有七彩光影的變化，頂頭會出現五百的字樣。用手指頭仔摸紙票倒引頂仔、倒引下仔恰正引下仔，會感覺五百的字嘍嘍。共紙票囡佇電火下跲，會當看著竹仔恰五百的水印。

用誠濟方法檢查，繩規晡了後，阮發覺這張五百箍的應該毋是假的。阿母足細膩看幾若改閣摸幾若擺，紙票有較皺一寡仔，不而過愈看是愈成真的，伊才穩心仔共彼張五百箍的囡入去皮包仔內底。

隔轉工阮母仔囡做陣出門，行到火車頭欲拆票的時陣，阿母心肝內小可仔膽膽，提彼張五百箍的欲予服務人員找，我目睷睷看，綴咧有淡薄仔驚驚。想袂到人連看都無斟酌看就共錢收去矣，閣隨找錢予阿母。諄！別人看彼張五百箍的真正常嘛，按呢阮到底是佇咧緊張啥？誠實是加煩惱的！

07『TPASS』，我的 má-tsih

林朝龍

為著保護環境，政府鼓勵逐家較捷使用公共交通工具，開始推揀『TPASS』通勤月票的政策，這馬臺灣足濟縣市攏有袂少優待的方案，嘛真受著通勤族群的歡迎。

阮臺東的『TPASS』是你若開兩百九十九箍買月票，就會使坐市區的公車、縣內的客運俗鐵路局的莒光號和區間車。三十工內，佇客運站上車、落車抑是火車頭入站、出站，只要薨一下，據在你欲坐啥物、欲坐幾逝，攏予你坐免驚的，真正省錢閣省工。

阮兜蹠佇臺東縣太麻里鄉的香蘭村，雖罔遮毋是內山斗底，毋過離火車頭猶有五公里遠。若想欲坐火車去外埤頭，實在誠無利便，所以阮庄裡的人，便若出門欲去臺東市內，若毋是駛自家用的就是愛坐客運的。我三不五時嘛會坐客運的去臺東市內四界蹠蹠咧，千千仔客運的票價貴參參，逐擺若欲共阮母仔提車錢，伊就毋甘搖搖。

好佳哉這馬臺東嘛有『TPASS』矣，我干焦用『TPASS』逐工坐客運的去太麻里的學校讀冊，就感覺省蓋濟矣。啊若歇睏日閣去臺東市內蹠蹠咧，彼就攏加趁的矣。今年我國中畢業矣，按算欲逐工通勤去臺東市內讀高職，坐客運的路程閣較遠矣，不而過仝款嘛是兩百九十九箍就會使拍

通關。這馬阮母仔若恰厝邊頭尾咧開講，攏嘛宣傳講：「『TPASS』真正是大碗閣滿墘，予咱蓋省錢。」『TPASS』真正予個呵佬甲會觸舌，逐家攏滿意。

阮阿媽有歲矣，若家己一个人出門較無利便。今年挂歇熱的時，我共阿媽講：「阿媽，你用博愛卡，我用『TPASS』，咱做伙來去四界行行咧好無？」阿媽聽了歡喜甲喙笑目笑隨應好。就按呢，阮媽孫仔兩個，今年歇熱有坐客運的去新港食現流仔的海產恰古早味的豆花，嘛有坐客運的閣盤火車去食池上便當、臭豆腐，閣租電動車撘「伯朗大道¹」呢！

臺東縣的地形是長篙形的，有的所在嘛無火車通坐，厝裡若無自家用的，步步著愛靠客運的抑是騎鐵馬，所以『TPASS』是阮縣民的福氣，更加是我上好的 má-tsih 啦！

¹伯朗大道(Pik-lóng Tāi-tō/Tuā-tō)

08 我欲選市長

鄭昱蘋¹

暗頓食煞，阿勇佇客廳共厝裡的人宣佈：「我欲選市長！」阿爸講伊猶未滿十八歲都無投票權咧，欲按怎選市長啦！讀國中的阿姊佇邊仔笑伊頭殼歹去，阿勇真正經共逐家說分明。

原來是個學校一年一擺會舉辦市長的選舉，這是為著欲培養學生民主的素養，予學生囡仔參與選舉的過程。這個活動干焦六年仔的學生才有資格出來選市長，啊五、六年仔的學生逐個人攞有投票權。欲出來競選市長的人，愛先經過全班的同學初選通過，才會使代表個彼班出來選市長。六年仔總共有九班，所以就有九個市長候選人。候選人有兩禮拜的時間通佇學校內底貼宣傳單、換票。頭一個禮拜二的早起時，候選人愛佇五、六年仔的學生面頭前發表政見，替個家己換票。等到第二個禮拜五的早起時就投票，一人一票，投票的時間干焦一點鐘爾爾。閣來是開票、唱票，尾仔會共票數和當選的候選人公佈佇學校的公佈欄佮網站。啊佇投票進前，所有的候選人攞愛先共個貼的宣傳單收予清氣。

「謊！無簡單呢！」阿公共阿勇比一肢大頭拇。阿母問阿勇伊的政見是啥？阿勇講：「阮的政見袂使烏白講喔！

我第一個政見就是中晝歇睏的時，愛開放予阮遮的學生捆手機仔、耍電動；第二個是拜六禮拜袂使出功課予阮寫，按呢阮才有時間通出去拍球、運動佮看冊抑是和同學去逗逗。」阿姊第一個跳起來拍嘆仔贊成。阿母講恁頂晡上半工的課，閣再講飯食煞人猶神神，敢真正閣有法度捆手機仔？

阿姊問阿勇講：「你若選有牢，你的政見敢真正會實行？因為我上無愛歇睏日寫一堆功課啦！」阿勇講：「毋管啥人當選學校的市長，阮的政見攞是提來參考的爾爾。」伊一下講煞，阿姊喝一聲：「啥物？」隨覆佇桌頂咧假哭，但是阿爸、阿母的面色若像有小可仔較輕鬆矣。阿勇行倚來阿姊的邊仔講：「你等我真正做市長的時，我的政見一定袂跳票！」

¹鄭昱蘋(pîn)